

MF Fó Ona Instrusaun Ba BSTL Atu Halo Transferénsia Sosa Asaun

Tatoli, 13 Marsu 2019



Ministra Finansa en ezersísio, Sara Lobo Brites

Imajen Egas Cristovão

DILI, (TATOLI) – Ministra Finansa en ezersísio, Sara Lobo Brites, informa Ministériu Finansa (MF) fó ona instrusaun ba Banku Sentráal Timor-Leste (BSTL) kona-ba transferénsia osan atu sosa asaun ConocoPhillips no Shell ho montante millaun \$650.

“Tanba ita serbisu ne’e husi parte tolu, Ministériu Finansa, Banku Sentráal ho Timor Gap. Parte Ministériu Finansa konklui ona, fó ona orden ba Banku Sentráal, daudaun Banku Sentráal ho Timor Gap estabelese hela akordu entre sira, mas ha’u fiar katak sira to’o ona iha konkluziun no sei transfere iha semana ne’e nia laran”, Sara ba jornalista sira iha Palásiu Governu hafoin reuniaun Konsellu Ministru, ohin.

Sara afirma tuir mekanizmu serbisu ne’ebé maka estabelese, Banku Sentráal sei transfere uluk montante ne’e ba Timor Gap depois sira prosede transferénsia ba ConocoPhillips ho Shell.

“Modelu halo transferénsia, Banku Sentráal jere Fundu Mina-rai hanesan jestór operasionál, pur tantu nia modelu transferénsia ne’e depois hetan ona instrusaun husi Ministériu Finansa sira sei halo transferénsia bazeia ba regra interna ne’ebé aplika iha Banku Sentráal”, ministra en ezersísio ne’e dehan.

Tanba osan Mina-rai ne’e iha Banku Federál iha Nova Iorque, Estadu Unidu Amérika (EUA), maka BSTL sei komunika ba Banku Federál hodi informa katak presiza halo transferénsia ho montante ne’e ba konta ida ne’e no MF fó tiha ona instrusaun ba BSTL.

To’o notísia ne’e hatún TATOLI seidauk konfirma ho BSTL no Timor Gap sobre transferénsia osan ida ne’e.

Jornalista: Maria Auxiliadora

Editora: Rita Almeida